

Greenpeace kamapim progrem long lukautim bus

Andrew Molen i raitm

OL lain bilong kempen o pait egensim wok we i save bagarapim ol bus, Greenpeace nau i wok strong long was long ol bus bilong Papua Niugini.

Greenpeace i lonsim progrem bilong ol "Global Forest Rescue Station (GFRS)" long Pot Mosbi long Tunde dispela wik we i lukim biknem sip bilong ol, Rainbow Warrior II i kamap wantaim ol wokmanmeri bilong en long lukim.

Long toktok bilong em long dispela bung, Memba bilong Huon Galp, Sasa Zibe i tok menesmen bilong forestri hia long PNG i bagarap tru na ol nupela rot long stretim dispela wok i mas kamap.

"Ol bikpela developmen wok long ol bus i noken i kamap nating na i mas kamap wantaim save bilong ol papa graun," Mista Zibe i tok.

Greenpeace i sanapim pinis dispela GFRS long Lake Murray long Westen Provins we ol wokman bilong ol long hap i save yusim olsem bes kemp bilong ol.

"Mipela i save stap long hap na go insait long bus long mekim wok bilong mipela," fores solusen kempena bilong Greenpeace, Sam Moko i tok.

Wok bilong ol long hap nau em long makim graun wantaim ol papa graun, na luksave long ol diwai na ol enimol long bus na makim wanem kain diwai ol i ken

mekim timba long en.

"Bikpela bilong graun mipela i makim pinis em i nap olsem 9,000 hekta na sampela moa eria em i ol i wok long makim i stap nau," Mista Moko i tok.

Sep Galeva em bilong 'Neiphaka' klen long Lake Murray eria na ol i go pas long dispela wok wantaim Greenpeace.

"Ol bus em i olsem bikpela stua bilong yumi, em i save givim yumi ol haus, kaikai na marasin.

"Em i mas i stap bilong ol pikinini bilong yumi long bihain taim," Mista Galeva i tok.

Em i tok ol loging kampani save bagarapim ol gutpela wara bilong ol, ronim ol enimol i go na bagarapim ol diwai tasol i nogat wanpela gutpela


developmen i save kamap.

Mista Galeva i bin wanpela polisman long forensic saiens divisen tasol em i lukim wok bilong ol loging kampani long ples bilong em i wok long bagarap ples na em i lusim wok long 2001 na i go bek long helpim ol pipol bilong em long painim rot long lukluk long dispela hevi.

"Mi toktok wantaim Damien Ase husat i salim toksave i go aut long husat ol lain i nap givim helpim.

"Em nau, CELCOR i kam na taim ol i surukim tok i go, Greenpeace i kam," Mista Galeva i tok.

"Lukim piksa bilong Greenpeace sip, Rainbow Warrior, long Pes 8.



LUKAUTIM BUS: Sep Galeva i amamas long wok Greenpeace na ol narapela ogenaisesen i mekim long helpim ol pipol bilong em long lukautim bus bilong ol.